

见山公传

公讳世甫，字见山，长沙益阳人也，世居邑之二十里大河煅，父母早逝，兄弟二，公居其次。夙慷慨，怀大志，抱负自雄，议论间往往露不可一世之概。尝喟然曰：“自科目取士，不知埋没几许人才矣！然亦齷齪者之所自取也。夫人怀才，何者不可以自见，而必区区守此无补天下之词章，以自潦倒于文场也。”遂挟剑肆游，临大河，登太行，南浮江淮，北过燕赵，访当世所谓豪杰者十年，终不得行其志。叹曰：“人生行乐耳。能得所乐足矣、贵矣，何苦自颠倒于傀儡场中乃尔耶！某山、某水无恙也，行将寻吾钓游旧地矣。”于是决然返，躬耕于里之赤岗寺侧，有田数顷，阙山筑茅庐数椽，四围种竹，复拓地数弓于左，为闲游之圃，种花数十种，掘地为池，朝夕负瓮自灌。畹兰春茂，池莲夏开，桔绿梅红，招二三良友赌酒其中，分韵争棋，欢呼终日。酒间尝举觞谓人曰：“此乡足了吾一生矣！”人曰：“公尚壮也，何者不可为而忍忘情天下哉？”公笑而不答。

春郊草长，公轻衫窄袖，竹杖担酒榼，偕二三童子嘻嘻以游。席地饮，醉即卧于草上，日暮忘归。水暖则

临溪以钓，得鱼，半以换酒半以下酒，或分赠野老。

一日钓于黑湖洲上，见负戴(载)来者歇两岸，皆望洋叹。公曰：“吾昔欲以一身济天下，今至不得济一乡，吾何心也！”遂集近居者剧金，倾己囊助。越二月，桥成，至今行者如履平地焉。辛酉元年，饥者聚为盗，官府捕得者杀无赦，时公老且病，闻之大痛曰：“吾德薄，不能使一乡饥不为盗，罪也使陷于罪而不谋所以救，罪莫重也！”遂命子铜章召诸犯者，令各具自新状，诣官力救，以一家保。一时得全者数百人。事解，取其状焚之，曰：“不使若辈贻子孙羞也。

呜呼！天之生才，原以济天下，欲使人人饱其惠，厌其泽，至于百千万年，乃扼于媚嫉者，仅仅表见于一乡，岂天之意也哉！岂公之志也哉！

吾为天下惜，吾更为公惜矣。虽然以科目取士已二千年，于兹其不见于天下而仅见于一乡者，又独公也乎哉？噫！公固古高尚士流也，而无用吾文为。而吾竟不能无言者，诚以公之年高德劭，有令人想像焉，而忻然仰慕云尔。

光绪十五年岁次己丑冬月吉日郡庠生

世愚晚邵钦氏胡学愚拜撰